

名

山

藏

名山藏卷之一

晉江何喬遠

王享記四

北狄

韃靼

兀良哈

韃靼北胡也其地東至兀良哈西至瓦剌其先入主中國而爲元都北平高帝以元年取元元主攜其后妃太子遁出塞居開平心未忘故都使其將擴廓帖木兒自太原來侵未至徐達與常遇春襲破之其明年遇春走其大同將竹貞曹良臣拒却其攻通州者

丞相也速乃無復故都意而納哈出據金山李思齊張思道據秦隴尚皆名元臣上以書諭元主及納哈出限地自守無縱部下盜邊皆不報達師遂西李思齊來降張思道走寧夏爲擴廓帖木兒所執於是上命遇春與李文忠分兵取開平克之俘斬其宗王平章數人元主益北徙居應昌而擴廓帖木兒居定西數擾邊上念窮追元永絕中國內患其明年春以徐達爲征虜大將軍使出西安擣定西李文忠爲左副將軍馮勝爲右副將軍使入沙漠擣應昌文忠至元主已卒子愛猷識里達臘立與擴廓帖木兒以其餘

衆走和林遂獲愛猷識里達臘子買的里八剌及其妃嬪若重器財寶降其衆五萬上封買的里八剌爲崇禮侯而虜人諡元主曰惠宗上諡元主曰順帝其生也稱之曰庚申君詔曰朕卽位之初遣使四夷臨諭君長咸奉職貢漠北以庚申君故未之及也庚申君殂凡爾酋長其各來附朕當更給印章還領所部馬牛羊孳畜從便地牧養毋爲災寇不者兵加誅于是諸酋先後歸附獨擴廓帖木兒居和林如故屢招不服五年春命徐達爲征虜大將軍李文忠爲左副將軍馮勝爲征西將軍出三道討之達戰不利斂兵

守塞勝軍至蘭州右副將軍傅友德先進多所斬獲  
敗之于亦集乃路又敗之于瓜沙文忠自臚胸河疾  
趨進敗虜將蠻子哈刺章于土刺河追至于土魯渾  
河又追至于騁海明年春虜先後寇永平慶陽塞守  
將輒擊敗之復命達文忠等備虜諸邊虜寇武朔諸  
州達遣陳德郭子興馳擊之追敗之荅刺海口斬獲  
甚衆而鴈門守將吳均大同守將王約亦相繼破虜  
其冬達破擴廓帖木兒于懷柔明年夏都督藍玉取  
興和李文忠亦遣裨將擒其平章陳安禮木屑飛太  
尉伯顏不花斬其將眞珠驢身攻克其高州大石崖

斬宗王朶朶失里擒承旨百家奴進至龜帽山破斬  
魯王及司徒荅海俊等其秋遣崇禮侯北歸明年擴  
廓帖木兒卒久之愛猷識里達臘亦殂是爲洪武十  
一年上遣祭之文以不失待亡國禮虜人諡愛猷識  
里達臘曰昭宗立其次子益王脫古思帖木兒其丞  
相驢兒蠻子哈刺章及國公脫火赤平章乃兒不花  
樞密知院愛足等時時寇塞下十三年命西平侯沐  
英往討擒脫火赤全部以歸明年大將軍達與副將  
軍友德征乃兒不花至北河襲灰山大克獲而納哈  
出猶據金山寇遼東聚衆至二十萬輜重饒虜主二

十年春上命宋國公馮勝爲大將軍率潁昌侯友德永昌侯玉南雄侯庸定遠侯弼將兵二十萬往擊之獲納哈出盡諭降其衆俘元官屬遺臣千有餘人上曰吾老矣今不滅虜後未弭也其秋卽軍中拜玉爲征虜大將軍率延安侯勝宗武定侯英都督忠都督恪定遠侯弼等復征之玉與延安侯窮入沙漠其冬獲元將九百餘人上察知虜勢不久存其明年復遣申國公鄧鎮等從玉師倍道兼進覆其巢穴蓋從者七侯玉深入至捕魚海穴地瘠薄之破殺其太尉蠻子脫古思帖木兒與其太子天保奴知院捏怯來斡

十騎遁獲其次子地保奴及妃主部酋三千男女七  
萬餘人馬駝牛羊十萬餘盡焚其鎧仗返於是漠北  
一空邊庭無警上大悅而賦平胡之詩脫古思妃旣  
至坐道與玉私慙懼自殺而地保奴出怨言上投之  
琉球脫古思帖木兒旣遁欲往和林依丞相咬住行  
至土刺河爲其臣也速迭兒所襲衆復散獨與捏怯  
來等十六騎偕適咬住來迎欲共依闊闊帖木兒雪  
不得發也速迭兒襲執縊殺之并殺天保奴捏怯來  
等遣使來降居之全寧應昌諸處未幾爲失烈門所  
襲殺部落遂潰而咬住與太尉乃兒不花知院阿魯



帖木兒時寇邊上命穎國公友德等以燕兵從燕王定遠侯弼等以晉兵從晉王往征燕王出古北口謂諸將曰虜地曠絕無間諜難功也發騎訶知乃兒不花處冒雪抵其迤都營使與雅故者指揮童往說乃兒不花迫偕之來燕王慰接遣歸度將至營復召之如此者三虜不能測悉収其部落馬駝牛羊捷奏上喜曰清沙漠者燕王也明年夏燕王督穎國公出塞捕番將阿失里等而和林之西有哈梅里者元屬兀納失里大王居之往來患苦西域貢使燕王復命都督劉真宋晟等攻破其城走之虜益衰終高皇帝世

脅息不敢大爲寇而上亦封壯王鎮邊爲邊藩虜自  
脫古思帖木兒後大臣紛拏蓋五傳至坤迭木兒咸  
未幾被弑不復知帝號矣文皇帝初鬼力赤立稱可  
汗去國號復稱韃靼獨所部大會稍稍仍故漢官名  
迎元後本雅失里於失八里居之帝遣使齎書幣往  
諭鬼力赤并勅其太師右丞相馬兒哈咱太傅左丞  
相也孫台太保樞密知院阿魯台使往來通好鬼力  
赤不從頃之寇遼東懿路寨官軍頗失利尋引去帝  
復書諭之先時虜酋猛可帖木兒者據有西部瓦剌  
地猛可帖木兒死酋分爲三曰馬哈木曰太平曰把

禿孛羅以鬼力赤弑其主不肯與朝會鬼力赤與阿魯台戰敗之明年夏文皇帝遣使招馬哈木等馬哈木等方失利遂遣使入貢上封瓦剌馬哈木爲特進金紫光祿大夫順寧王太平爲特進金紫光祿大夫賢義王把禿孛羅爲特進金紫光祿大夫安樂王而所使往鬼力赤者皆不返鬼力赤立數年復爲阿魯台所殺立本雅失里爲王七年上遣都指揮金卜歹給事中郭驥往諭本雅失里本雅失里謂我封其三強酋殺之上大怒發精騎十萬命淇國公丘福爲征虜大將軍率武城侯王聰同安侯火真靖安侯王忠

安平侯李達往擊之而本雅失里已爲瓦剌所襲破  
與阿魯台徙臚胸河矣福率千餘人先至臚胸遇虜  
游兵擊敗之軍未集福乘勝絕幕軍至虜衆奄圍之  
五將軍皆沒上益怒明年自將五十萬衆出塞及虜  
幹難河本雅失里來拒戰上麾先鋒逆擊之本雅失  
里棄輜重物畜以七騎遁幹難河者元太祖興地也  
班師至靜虜鎮阿魯台復來上率精騎衝擊之亦敗  
走請降君臣始各部而居又明年馬哈木等乘本雅  
失里弱滅之立谷里巴阿魯台遂內附請爲本雅失  
里復讎馬哈木亦來言請征阿魯台且言傳國璽在

阿魯台所欲取獻上兩置之然心嘉阿魯台義封爲和寧王馬哈木怨自是朝貢不至畱我使人上怒命中官海童切責之十二年自將往討三酋掃境來戰上率鐵騎大敗之殺其王子十餘人斬首數千級追至土刺河馬哈木遁去班師至飲馬河阿魯台稱病遣其大會以下來朝會上賜阿魯台米百石驢羊各百別賜其部落米五千石明年春馬哈木等貢馬謝罪送還所畱使詞卑上曰虜禽獸也不足較受其獻館其使者明年春阿魯台與瓦剌戰破之使使來獻俘未幾馬哈木死先是海童責瓦剌歸言所以拒命

者順寧王順寧死賢義安樂可撫也於是上復遣海童往勞賢義安樂二王十六年春海童及瓦刺貢使至馬哈木子脫懽請嗣爵上復封脫懽爲順寧王而使海童及都督蘇火耳灰等以綵幣往賜太平把禿孛羅及其弟昂克別使使祭故順寧王自是瓦刺復奉貢而阿魯台貳初阿魯台內附以迫瓦刺窘甚南保塞自歸上納而封之旣得休息生聚畜牧數歲蕃富遂慢我使者拘留之彼使歸行劫掠其部落往往寇塞下二十年春大入興和於是上復欲自將征阿魯台阿魯台聞兵出其母妻罵之曰明皇帝何負爾

爾入擾其塞吾屬虜矣阿魯台盡棄其馬駝牛羊輜  
重于闊濼海側與其孥直北徙上命焚其輜重收其  
馬駝牛羊遂班師明年七月虜降者言阿魯台將入  
寇上諭諸將虜意朕不復出先出塞待之諸將皆曰  
善部分行寧陽侯陳懋爲先鋒追至宿寇山不見虜  
遇王子也先土干率妻子部屬來降上封爲忠勇王  
賜姓名曰金忠忠勇王至京師數請擊虜自効上曰  
漢過不先姑待之明年春正月開平守將奏虜盜邊  
羣臣勸上如忠勇王言遂親征出塞數千里至荅口  
蘭納木兒河不見虜還崩於榆木川文皇帝凡五出

漠北三犁虜處鞍馬橐鞬與將士不異勞苦其深入  
虜城還望北斗乃在南天是時中外疲費計臣凜凜  
虞軍興然而沙漠震威遐方賓服當文皇帝世內附  
韃官率部落雜居塞上不異我民降胡奔卒悉見收  
養有用爲腹心以至公侯者矣宣德元年太平死子  
捏烈忽嗣封爲賢義王而脫懽阿魯台所以事朝廷  
甚恭宣宗念之授之官往往厚其賜予此兩王者內  
慕朝廷外相攻不解阿魯台爲脫懽敗走脫身入兀  
良哈駐牧遼塞脫脫不花王子復至塞下襲殺阿魯  
台妻子部屬掠其孳畜阿魯台與其子失捏子止餘



人馬萬三千徙居丹納山察罕腦刺等處脫懽復襲殺阿魯台及其子使人來告且欲獻前璽上賜勅曰王言殺阿魯台見王克復世讎傳國久遠不在璽也王得璽王自行之是爲宣德九年脫懽旣擊殺阿魯台悉收其部兼併賢義安樂之衆於是欲自立爲可汗衆不可曰脫脫不花王子元後也脫懽乃請脫脫不花爲可汗以阿魯台衆屬之自爲丞相居漠北哈喇噏等部俱服屬焉而阿魯台之子阿卜只俺窮蹙來歸朝廷官之爲左都督傳至其孫勇封靖安伯繇其和寧王遂以和爲氏而所部阿台王子朶兒只伯

者爲脫脫不花所收捕竄居亦集乃路外爲納款而  
數入寇甘涼睿皇帝元年命都督蔣貴征之明年春  
復命邊將方政史昭丁信楊洪等分道往討皆無功  
乃命尚書驥行邊得便宜行事其冬命都督任禮爲  
平羌將軍都督蔣貴趙安副之尚書驥督師明年夏  
禮貴破阿台朶兒只伯于石城殘虜食盡竄于兀魯  
乃地依阿台貴將輕騎二千五百人出鎮夷閒道兼  
行三日夜及之擒其僞將相脫羅及部屬百人斬首  
三百有奇逐殺八十餘里阿台朶兒只伯以數騎遁  
逐之梧桐林追襲五百里至黑泉僞平章阿的干以

餘黨降趙安出他道復破之刀力溝擒僞右丞等三十人逐出塞千餘里奪還永樂中所封和寧王誥勅玉圖書以歸莊浪指揮魏榮獲其姪把禿孛羅阿台朶兒只伯亦來歸矣然亦外納款而已未幾脫懽破殺阿台及朶兒只伯益東誘兀良哈女直窺塞下四年脫懽死子也先嗣稱太師淮王太師者虜酋大號也是時虜衆皆服屬也先脫脫不花具可汗名而已顧下妻也先姊主臣竝使貢我亦兩勅荅之賞賜繒綵帽纓珠寶靴刀琵琶火撥思之屬不可勝計及其妻子部屬皆有等差針線脂粉絲絨皆具虜人嗜我

賜增人入貢歲益多屢勅不奉約使往來殺掠要素  
稍不厭輒造釁端所請財物輒歲增至中國所貴無  
有者益誘雜夷與偕又攻哈密執其王母掠沙州破  
兀良哈脅誘朝鮮邊將皆知其必爲寇屢疏聞勅戒  
防禦而已十一年冬攻兀良哈歸遣使來乞糧并乞  
見守大同者大監郭敬上勅敬母見母予糧明年虜  
使使致書宣府守將楊洪洪以聞勅洪禮其使報其  
書洪守宣府有威名虜慕服之而敬歲私遺虜鐵簇  
與虜善故虜欲見也頃之也先部下有來歸者言也  
先謀入寇脫脫不花止焉吾屬受明恩何忍爲此也

先曰可汗不爲吾自爲之上旣屢勅讓也先也先益  
糾結諸胡貽書兀良哈曰爾祖父皆元成吉思可汗  
薛禪可汗所授官俱宜供頓過軍兀良哈以聞詔問  
也先不報成吉思者元太祖薛禪者元世祖也故事  
虜使歸我使送之因留明歲與俱來虜時要索中國  
貴無有者使者輒許以媚虜又往往出好語迎中之  
也先奏胡樂使者曰是安能及中國女伎耶還當請  
爲太師賜也先言使者爲我請婚使者陽應諾已謾  
之曰爲太師奏許矣也先大喜誇示諸酋十三年大  
貢馬爲聘來者三千人而朝廷不知也所答詔不及

婚事禮部復不盡予三千人餽予之物不及所請五之一虜大槐怒十四年七月誘脅羣胡大舉入寇脫脫不花王寇遼東知院阿剌寇宣府圍赤城又別遣人寇甘州也先自寇大同偏將吳浩戰死貓兒庄羽檄紛至太監王振方用事執文皇帝宣宗故事勸上親征羣臣伏爭不得也西寧侯宋瑛武進伯朱冕都督石亨與也先戰陽和口被太監郭敬撓軍盡敗沒及車駕至大同風雨連朝議旋師將發阿剌襲我後恭順侯吳克忠拒之成國公勇永順伯綬以四萬人繼往盡敗沒克忠下馬跪射矢盡猶刺殺數十人與

弟克勤皆死綬以空拳擊虜虜支解之既知其故山  
後人相與哭之曰吾醜也故爾勇次日至土木王師  
議入保懷來振額私重不行遂止營也先乘勝前逼  
損傷士卒以數十萬扈從之臣死者五十餘人上蒙  
塵坐地而虜人不識也既見上舉動非常驚問無大  
明皇帝耶虜舊使來者上識其名呼問之使人驚果  
大明皇帝也也先有第三人曰伯顏帖木兒曰賽刊  
王曰大同王則相與召其會長聚議所以處皇帝者  
皆有不善之意獨伯顏帖木兒不可也先即使伯顏  
帖木兒善事大明皇帝上居伯顏帖木兒營也先數

奉車駕塞下以求入塞時兵部尚書于謙已立上弟  
郕王爲皇帝稱上曰太上皇約諸將無輒納太上車  
駕絕虜邀挾心上居虜時時見異兆虜不敢加害而  
伯顏帖木兒與也先事上甚恭也先曰中國別立皇  
帝終不使皇帝還也我當立皇帝爲皇帝帝之大都  
以南則設宴進馬拜慶亡何復率其大衆奉駕直至  
京師京師閉門而不敢納也先奉上皇還乃所以事  
上皇益恭時時稽首行君臣禮又時殺馬設宴召妻  
妾以次上酒伯顏帖木兒亦與其妻見上皇如也先  
禮大同賽刊二王亦見上皇如伯顏帖木兒禮獻馬



牛羊若牛馬漣射生物畜不絕其明年復奉駕太同  
塞下守將不納上皇復去居虜營上意落落穆穆而  
虜所以事上如初最後楊善往迎駕駕將歸也先殺  
牛馬餞手彈琵琶妻妾奉飲居數日築上臺坐上皇  
臺端妻妾會長膜拜其下各獻器用飲食物上皇行  
也先與酋長送可半日程下馬羅拜伏地慟哭伯顏  
帖木兒別送上獨遠其所部跪伏道傍善口呼大明  
皇帝行矣上皇攬轡慰藉而與之別是役也我命之  
曰正統己巳之變上皇歸則其明年景泰元年也自  
是虜貢不絕屢請送使如故事羣臣請許之制曰使

通虜有前事朕思絕虜也尚書金濂胡濙相繼言絕  
且爨制曰朕志定矣於是勅脫脫不花可汗前者使  
往小人言語短長兩國傷好朕與可汗共知也可汗  
請答使朕今不復遣可汗使朕皆優禮厚給之顧亦  
須少人賞賚乃得厚別敕也先指如之時脫脫不花  
與也先不相能所妻也先姊生子也先欲立爲太子  
脫脫不花不從也先亦疑其通中國爲已害遂治兵  
相攻脫脫不花敗走依兀哈被弑也先盡收其妻  
子殺元裔幾盡吞併諸部東至女直西至赤斤蒙古  
復使來請送使制詔所以答之如前然是時虜使來

不減三千益驕橫稍約束卽彎弓相向十月也先自立爲可汗稱大元田盛大可汗致書皇帝田盛華言天聖也我報書稱之曰瓦刺可汗此時阿刺爲也先大將自言也先求爲太師曰主人衣新衣幸以故衣賜臣也也先不許阿刺怒也先殘忍荒酒色諸部稍解散忌阿刺欲討之恐不勝乃自遣其子守西番召阿刺二子從先鴆殺阿刺次子阿刺懼詐言兀良哈盜馬請召還其長子合擊之也先使賽刊大同二王與俱臨行觴焉中途阿刺長子亦中鴆死阿刺益怨給賽刊大同前渡川自後率部落三萬趨也先所

之曰漢兒血在汝身上脫脫不花王血也在汝身  
上兀良人血在汝身上天道好還血在我矣也先曰  
今者我裁明與汝戰退與伯顏帖木兒眞孛羅平章  
等議帳中有阿剌故部曲三人轉事也先久也先不  
之疑因其趨帳中援所佩劒刺也先并殺伯顏帖木  
兒等賽刊王聞變領七千人躡之既知也先死棄衆  
去乘十七橐駝南爲其下卜兒荅追及射殺之而大  
同王領其人馬西奔於是也先諸子分部北邊離合  
不常凡刺稍衰矣虜中有孛來者殺阿剌求脫脫不  
花子尊立之號小王子而自爲太師自是虜以小王

子爲尊稱而有毛里孩兒加思蘭諸酋相繼爲邊患  
虜人謂孩爲父稱父曰阿孩稱祖曰阿不孩然睿皇則名孩者舉其尊稱以謬中國而中國不知也帝復辟念居虜中時故得伯顏帖木兒周旋遣都督馬政齎賜其妻孥來留不遣使使人賀欲獻璽勅曰璽非真卽真秦物耳獻否惟爾爾何留我馬政爲天順二年春孥來大舉寇陝西安遠侯柳溥統兵禦之輒敗猶時飾小捷聞御史劉濬劾之溥行賄得釋已虜大熾關中震動乃召溥還奪太傅明年春虜入大同定遠伯石彪破走之都督周賢都指揮李鑑戰死其秋復寇大同直抵鴈門忻代殺掠甚衆烽火達京

師遣都督顏彪馮宗屯紫荊倒馬二關爲援虜往來  
自如勅二關兵出鴈門虜始退明年春寇延綏榆林  
守將彰武伯楊信拒却之其夏寇河西守將仇廉禦  
之敗績遂渡河大掠關隴震動而侍郎白圭都御史  
王竑相繼出禦虜其秋字來三上書求款命指揮昇  
齎勅撫諭其冬字來遣使隨昇來報命且請從陝西  
入從之未幾復糾毛里孩入河西詔青讓令仍繇大  
同毋趨陝明年虜使繇大同詔毋多挾人畱其餘塞  
下官餽之聽與邊人交易未幾小王子沒或云字來  
弑也虜其立其從兄脫思爲主稱馬可古兒吉思王

子遣使入貢賜勅詔諭之咸化元年孛來誘兀良哈九萬騎入遼河武安侯鄭宏拒却之其冬寇延綏命彰武伯率大同兵御史項忠率陝西兵禦之皆無功而毛里孩者攻殺孛來弑馬可古兒吉思虜更立他可汗毛里孩復弑之自稱黃苓王別酋孛魯乃亦稱齊王遣使人貢於是諸酋內爭孛羅忽者結毛里孩幹羅出者結札加思蘭各樹黨相攻始虜之來也或在遼東宣府大同或在寧夏莊浪甘肅去來不常爲患不久景泰初始犯延慶然其部落不敢深入其後虜我漢人劫之爲向导遂入河套據之河套者古朔

方郡唐張仁愿築三受降城焉其地饒水草外爲東  
勝衛東勝而外地平衍虜來一騎不能隱國初守之  
後以曠絕內徙至是虜穴焉深山大川其勢在虜而  
寧夏內險反南備胡矣訖加思蘭故領別部居哈密  
北山天順未侵掠哈密雄視諸番竟東渡河與虜合  
也二年夏六月延綏上使彰武伯信爲平虜將軍都  
督趙勝副之率京兵萬人諸邊兵合萬人往擊未至  
虜入固原都指揮林盛戰敗信至虜退其冬復入延  
綏參將湯胤勛敗死而諸臣言復套者種種矣明年  
春毛里孩乞通貢不許則渡河東侵大同以撫寧侯



朱永爲平胡將軍率京兵往都督劉聚鮑政副之會  
毛里孩再來貢詔永駐軍而瓦剌自也先死後數歲  
戢至是其子阿失帖木兒者遣使來貢復稍張與毛  
里孩諸酋拿兵爭雄長諸酋亦坐是不得并力於我  
其冬幹羅出糾兀良哈寇延慶於是撫寧侯永爲平  
虜將軍都御史王越率京邊二軍往禦之永至亦數  
以捷聞越等俱陞賞論功永世侯然虜據套自如延  
綏大同塞下大擾而所調遣二軍六萬有餘餽運艱  
矣兵部亦言虜未可遽滅宜散遣塞下諸軍食於本  
堡七年冬召永還以邊事委越及總兵許寧會虜入

敗參將錢亮寧不能救兵部尚書白圭請大發兵搜  
套集廷議請擇遣大將專事虜於是以武靖侯趙輔  
爲平虜將軍悉部署諸路王越仍督師虜大入延慶  
輔不能禦未幾稱疾召還以寧晉伯劉聚代之聚未  
至虜相繼掠固原延寧諸處而延綏巡撫余子俊埤  
山築牆設墩臺砦堡虜自是不敢大入毛里孩孛魯  
乃幹羅出三會亦稍衰敗而滿魯都入河套稱可汗  
訖加思蘭爲太師以女妻之九年秋與孛羅忽竝寇  
韋州王越偵知虜盡行老弱巢紅鹽池可取也與許  
寧及遊擊周玉等分薄其營大破之師還邀敗滿魯

都等於道虜自是遠徙不敢居河套矣始乧加思蘭以女妻滿魯都欲代爲可汗恐衆不服謀殺滿魯都而立幹赤來滿魯都知之索幹赤來乧加思蘭匿不與攻逐滿魯都併有孛羅忽之衆滿魯都部酋脫羅干亦思馬因復攻殺乧加思蘭亦思馬因稱太師自乧加思蘭死虜數歲稀入寇而是時中官汪直少年用事王越朱永附和之十六年春邊報至遂命未爲征虜將軍直與越俱督師出塞捕虜越爲直謀給未將大兵繇他道身與直將輕騎從宣府大同俱會於榆林旣至大同虜已大掠出塞越謀虜帳在威寧海

則選二鎮之勁騎二萬餘與直分道乘風雪薄之虜  
狼狽出戰破之斬四百三十七級鹵男婦百七十馬  
駝牛羊以數千計旗纛甲仗萬餘詔封越威寧伯十  
八年春禦虜于延綏小捷賞賚甚衆虜亦益盜邊不  
休明年夏秋虜三萬餘騎屢入寇大同邊連營者五  
十里殺掠人畜數萬大同總兵許寧禦之無功乃以  
捷聞虜旣得利長驅入順聖川散掠蔚朔諸州烽火  
徹圻內宣府巡撫秦紘總兵周玉力戰却之而巡撫  
山西都御史邊鏞亦能與參將支玉悉力捍禦然虜  
去輒復來至成化末無寧歲而是時滿魯都已衰弱

不知所終其入寇者復稱小王子或稱把禿猛可王  
卽故小王子後也與其太師亦思馬因不協相攻亦  
思馬因死而瓦剌有兩太師一克捨一革捨克捨死  
其弟阿沙赤爲太師革捨弟阿力古多與相讎殺小  
王子死弟伯顏猛可代爲小王子弘治元年夏小王  
子奉書求貢自稱大元大可汗我以虜僭名號其故  
態不問也伯顏猛可立幼恐太師專權廢不復設與  
瓦剌屢入貢時馬文升在兵部許進巡撫大同數貽  
書小王子言通貢利諸邊稍稀虜患異成化時矣其  
後乃有火篩火篩者脫羅干之子小王子部落也狡

善善用兵劫諸部屢寇邊獲財畜日強盛與小王子  
爭雄長邊患復熾十年冬寇肅州復以王越鎮陝節  
制諸軍明年秋越襲賀蘭山後虜破之明年虜寇榆  
林寧夏大同多殺掠明年春寇威遠遊擊將軍王杲  
敗績右參將秦恭副總兵馬昇逗留不進皆論死其  
夏連寇大同總兵王璽等失亡多命平江伯陳銳及  
侍郎許進率師禦之銳怯罷還代以保國公朱暉進  
亦致仕去虜猖獗甚京師戒嚴以都御史史琳督師  
大同虜解去明年春迭入延綏復命保國公暉都御  
史琳統諸路兵西禦虜太監達監軍暉行至河套襲

虜斬三級驅牛畜數百歸而賞過之虜分道掠固原寧夏諸邊輒從花馬池入西北大擾暉等不能禦召還以秦紘督師鎮陝虜稍靖十七年夏歸正人報虜有異謀其秋虜入大同殺墩軍時天子方銳治思一大創虜如文皇帝時而劉健謝遷諸大臣以承平久不敢決上然上猶拜朱暉爲征虜大將軍苗達史琳督師豫簡京軍分遣大臣督餉大同居庸關俟警至會虜引去暉等罷行明年春虜三萬騎圍靈州詔督諸鎮兵往援虜圍久不克解去散掠內地總兵李祥偏將仇鉞擊走之敬皇帝崩踰月虜大舉寇宣府總

兵張俊分遣諸將禦之皆爲所圍俊疾救解遊擊將軍張雄穆榮敗沒士死傷數千失亡人畜無算復命達暉琳出禦都督李俊神英都指揮陳雄張澄佐之皆無功還其冬虜入鎮夷所指揮劉經死之復自花馬池毀垣入掠隆德靜寧會靈諸處再旬乃退關中大震以楊一清爲總制時正德元年春也會逾瑾竊柄輔臣本兵相繼逐去一清旋致仕諸奄四出稱守備監軍暴螫行間邊事益困矣三年春虜近塞下命兵部侍郎文貴開府督師貴所請度支金錢巨萬名修邊費實半輸瑾虜所殺掠男婦數千雜畜器械倍



之明年夏命工部尚書才寬節制延寧甘肅諸軍貴  
專督宣大其秋虜伏延綏塞下遣輕騎攻新興堡副  
總兵侯勛禦之伏起被圍會救至虜解去喪馬二千  
七百餘匹殺傷略當寬以捷聞其冬虜入花馬池寬  
禦之敗死總兵馬昂與別酋亦孛來戰于木瓜山諸  
處頗有斬獲其年亦不刺入西海而西海始有虜亦  
不刺者小王子丞相也小王子與火篩讎殺火篩死  
復以他事怒亦不刺欲殺之亦不刺懼擁萬衆掠涼  
州攻破安定王等族奪其誥印諸番苦之別部阿爾  
禿斯與亦不刺合日與小王子尋兵敗則掠邊破堡

寨殺兵民顧守臣輒以捷聞甘肅巡撫張翼咱虜金帛令遠徙虜遂掠烏思藏據之自是轉掠松潘洮岷無寧歲小王子復屢入宣大塞殺掠慘于西陲八年夏五萬騎繇大同入犯寧武倒馬諸關以咸寧侯仇鉞總兵禦虜鉞至屬虜寇萬全衛與戰失亡多以捷聞未幾奏虜退召還明年秋小王子入宣大塞別部自懷安入順聖川遊擊張勛守備田琦廉彪戰死總制都御史叢蘭告急詔太監張永督宣大延綏兵都督白玉爲大將協蘭禦虜他將皆屬永等多挾從人多所請乞未出國門已費金錢十餘萬卒無功蘭王

與虜戰于平虜城南潛置毒飯田間如農家餉虜食之多死者明年秋十萬騎入大同明年夏入大同詔都督劉暉侍郎丁鳳率師禦之虜突入白羊口大掠去未幾復以七萬騎分道入總兵潘浩與戰貴家灣敗績都指揮朱春指揮王唐死之浩再戰再敗虜遂犯宣府殺掠無算浩奪三官諸將罰治有差十二年秋五萬騎入大同塞屬天子以遊幸至陽和親部署總兵王勛等遇虜應州虜圍之督兵援助殺殊死戰虜稍却會暮休營明日虜來攻自辰至酉戰百餘合虜引而西追至平虜朔州會大風黑霧晝晦上乃還

是後虜雖歲犯邊然罕大入小王子死有三子長阿爾倫次阿着次滿官噴阿爾倫前死二子長卜赤次也明皆幼阿着稱小王子未幾死衆立卜赤稱亦克罕克罕猶可汗也然亦稱小王子如故嘉靖元年入花馬池大掠西安鳳翔三年秋大同巡撫張文錦離鎮城築水口等五堡禦虜衛城遣卒二千五百家戍之卒畏徙參將賈鑑督之嚴卒殺鑑及文錦多走出塞降虜明年屢入陝西諸寨殺吏民亦不剌復駐牧賀蘭山後出沒擾邊六年春虜連寇宣府參將王經關山俱戰死其秋數萬騎入寧夏塞總兵鄧卿杭雄

拒却之斬首三百餘級明年春掠山西其冬五萬騎掠宣府總兵趙瑛等拒却之已復大掠陽和至朔州指揮趙源戰死明年春數萬騎入寧夏塞杭雄禦之敗績遂絲鎖羗人西海與亦不剌解仇結親謀內犯十一年虜款延綏塞詔却之退而怒擁十萬騎入寇總制唐龍請許之上曰虜宜討大臣取目前計優縱之耶龍連戰頗有斬獲虜不得間突以數萬騎渡河西襲卜兒孩大破之收其部落勢益強盛卜兒孩者亦小王子部遁入西海與亦不剌阿爾禿斯共患邊者也明年秋虜窺大同塞總兵李瑾治軍嚴大同卒

因是攻殺瑾總督劉源清欲盡法行誅卒嬰城叛遣  
小王千金幣女伎曰中土饒勝沙漠也指代王宮曰  
以此爲那顏居小王子勒兵應之遊騎至應朔諸州  
旋解去亂亦隨定是時小王子最富強控弦十餘萬  
多畜黃金犀毗稍厭兵其連歲深入蹂西北邊皆其  
別部酋曰吉囊曰俺荅二酋亦元裔于小王子爲從  
父行其大父曰歹顏哈有十一子次曰賽那刺有七  
子長吉囊次俺荅皆雄黠善兵吉囊壁河套名襖兒  
都司直關中俺荅壁豐州灘直代雲中吉囊俺荅各  
九子子各萬騎其弟老把都亦數萬騎壁張家口諸

昆從百十皆有分地率盜邊自肥日益強盛名尊小  
王子不受其約束小王子亦徙壁東方直薊遼號曰  
土蠻異種黃毛者兇悍不能別死生衆少於三部虜  
或時深入黃毛輒從後掠取其子女玉帛虜因合兵  
急擊大破黃毛以是無反顧專事我十三年春入延  
綏秋入花馬池掠固原殘安定會寧二縣總兵王效  
副總兵梁震禦之斬首二百餘級虜東犯大同十五  
年秋復入延綏總督劉天和督諸將禦之斬首百餘  
級明年春入甘肅大掠已分掠東西諸塞無寧日諸  
將莫能禦獨大同總兵梁震數以家丁劫其營虜畏

之十八年秋虜寇宣府逮總兵江桓下詔獄明年春  
入延綏奪總兵周尚文俸其秋大掠宣府至蔚州堡  
寨盡破總兵白爵遇虜于水泉兒大敗副總兵雲冒  
再遇馬連堡又敗留兩月乃退巡撫楚書以捷聞西  
虜復掠固原會大兩道寧虜騎困弓矢膠劉天和與  
戰大獲殺吉囊子小十王捷聞上喜甚天和及周尚  
文等皆增秩諸賞賚甚渥明年秋虜遣使石天爵款  
大同塞巡撫史道以聞詔却之以焚繼祖督宣大山  
西三鎮兵道遣天爵還陰賂虜令無蹂躪已所部虜  
不得請遂大舉內犯吉囊先繇白泉口長驅至寧武



關石湖嶺副總兵丁璋力戰死繼祖堅壁不敢戰俾  
遊擊將軍周宇禦虜太原北死之虜越而南殺掠至  
平遙居民培白挺與格虜以故却而俺答復入又越  
太原至石州殺掠益甚浸淫平定壽陽閒矣言官交  
章劾繼祖竟不罪罷歸而黜道爲民二十一年俺答  
復遣石天爵滿受禿滿克漢求貢大同巡撫都御史  
龍大有誘納之縛天爵殺受禿等猥言以計擒得者  
上擢大有兵部右侍郎諸將吏陞賞者數十人梟天  
爵於市俺答怒入寇屯朔州廣武越鴈門關趨太原  
諸將卒無禦者遂南下沁源襄垣長子等州縣已復

蘇忻崞代移營北屯祁門參將張世忠督兵力戰虜

圍之數重自已至申所殺傷相當已而世忠矢盡見

殺百戶張宣張臣俱死俺荅青台吉吡蠟哈哈刺漢及叛人高懷智李天章各擁

萬衆越太原列營汾河東西散掠上黨平陽我帥連營莫相攝觀望而已偏帥張世忠起營約戰諸將皆

閉營自守虜以騎三千餘圍世忠世忠憤曰諸將不念血盟耶世忠傷虜矢下馬去我亟且大藥盡呼曰

我軍被圍戰苦諸將竟不相援虜從鴈門故道去茲

國憲天刑寧汝追耶遂戰死人也往返踰月凡掠十衛三十八州縣殺虜十餘萬

人馬牛羊十倍之焚公私廩舍八萬區蹂田禾數萬

頃皆以石天爵爲詞時上極意憂邊出京兵捐內藏

有請輒應顧虜氛熾甚將士東西疲馳驚且積弱習

怯往往恣虜深入伺既去則掠一二情歸者告捷甚  
至殺降拾死屍轉鬻賣諸督府亦姑聽之於是戒律  
日弛內地之塗炭極矣吉囊歸與所鹵忻代妓日夕  
淫縱死諸子不相屬分居西邊於是俺答獨強盛俺  
答有九子長曰黃台吉其有名者曰青台吉曰鐵背  
台吉黃台吉臂偏短善用兵其衆畏之用命過於俺  
答黃台吉勸俺答毋臣土蠻土蠻伐之不能克與連  
和亦不刺阿爾禿順始雖連匿西海爲甘涼患然猶  
與虜角其後亦折而入虜二十五年俺答復使使詣  
大同塞求貢爲邊兵所殺其秋復來請上不之許蓋

累年開求貢而我輒拒之我既不能有所加虜虜益畜憤深入而邊臣掩敗匿功者踵至上雖憂邊亡繇知其敗壞也是時總督陝西兵部侍郎曾銑自謂見才與大學士夏言善則請議復會言秋高馬肥此中國詘時也冬深水枯馬無宿藁比及春深賊勢益弱虜詘時也臣請用練卒六萬益以山東槍手二千每春夏之交攜五十日糧抵其巢穴材官驟發礮矢雷激虜不支矣歲歲爲之且懼遠徙我乃竝河爲塞置衛所分戍卒修屯政用以省轉輸壯形勢中興大烈也惟陛下裁斷下兵部以爲難而上壯之令銑圖

上方略聽便宜從事其明年總督宣大翁萬達言虜自冬春來輒求貢詞恭似可許上方主銑議責萬達其明年上意則中變下廷臣再議甘肅總兵仇鸞在鎮貪縱銑劾之被逮至則言銑與夏言朋奸啓釁上怒而夏言曾銑誅矣銑善治兵虜聞銑至其羸弱皆嚙指自其誅無敢議復套者其妻子皆流徙而天下哀之其秋虜犯宣府入鎮安堡經雲州永定隆慶懷來等處屠堡數百殺掠人民數萬關輔大震二十八年把總指揮江瀚董賜與戰滴水崖沒全軍虜遂東犯永寧大同總兵周尚文宣府總兵趙國忠追敗之

是歲寇大同寇榆林寇宣府寇遼東而邊人困甚矣  
二十九年大同總兵張達副總兵林椿爲虜所敗死  
虜得二將頭遽引去傳箭諸部大舉詔發京邊二兵  
備之邊兵遠不能猝至京兵市人耳其秋以數千騎  
寇薊鎮入古北口都御史王汝孝力禦之稍却虜悉  
衆綴我師別以精騎繇間道踰嶺出師後京兵大驚  
潰虜遂大殺掠順義密雲懷柔近畿諸縣吏士亡算  
俄犯京師京師猝不備虜駐旬日出關上怒兵部尚  
書丁汝襲若以勤王至者都御史楊守謙不戰而汝  
襲守謙誅矣是役也我命之曰嘉靖庚戌之變是時

上罷喜仇鸞拜爲大將軍仇鸞者故代張達爲總兵  
知虜欲大舉入大同使其僕時義賄之東寇以有薊  
鎮之人鸞乃佯奏若先知虜入薊鎮者請提兵備京  
師兵至虛聲張遠戰上見汝襲守謙蓄縮謂鸞能專  
以邊事付鸞鸞多作大言而已而俺答寇歸畜產死  
人民疫病其所掠又皆歸於部落乃使其子脫脫請  
息肩於邊於是鸞始議開馬市中虜詔給金十萬易  
布幣市開於五堡漸及延寧使侍郎史道主之明年  
成俺答出塞甚喜而是時中國人以罪亡入虜中者  
有丘富周原蕭芹之屬富有智略俺答待之厚至親

爲掃除富說虜墾田積粟造舟渡河大收謀勇之士  
俺答懸書穹廬之外曰嘗爲中國舉人諸生者有幸  
臨吾厚遇之邊民黠智者率詣俺答自言舉人諸生  
俺答令富試能者統騎伍不能者給甌脫地使耕芹  
說俺答曰市非計也聞大同帥毒水上流陰伏甲市  
傍太師幾不免虎口矣大同歲不稔城虛可咄嗟破  
也破則大獲其子女玉帛是之不利而市爲俺答頗  
然之其左右復受芹賂爲言芹有異術能使城自頽  
者芹乃令其黨入城內應市畢則擁虜門我諸門會  
謀泄引還史道遣人讓虜虜內媿因以千騎隨芹入



試其術不効乃告我曰劫城者芹教我道又賂脫脫  
令縛芹虜因執芹并其黨數十人上聞道驚皆進官  
秩然芹其小小者耳數令虜苦我邊者丘富也是時  
兵部郎楊繼盛言市非計上下繼盛吏謫其官而虜  
市畢則復掠且約河西諸部內犯且請以牛羊易粟  
豆且爲土蠻請市上見虜無厭詔罷市召繼盛還而  
虜以故連犯遼東於是徐階發鸞賄虜事會鸞死發  
棺僇其屍時義等悉論棄市三十二年秋俺答大舉  
入寇下渾源東寧靈丘廣昌等處急攻挿箭浮圖等  
峪關南大震固原遊擊陳鳳寧夏遊擊朱玉擊却之

虜分兵東犯蔚西掠代繁峙等縣而套虜駐鄜延半  
月餘延慶諸州縣屠掠且徧乃移營中部以瞰涇原  
會久雨乃去蓋入內地者二十餘日所殺擄擒掠無  
類矣三十三年虜犯大同左衛總兵岳懋與戰死復  
殺掠至朔凡十餘日其冬薄攻薊鎮牆百道竝進警  
報日數十至上爲之動總督楊博總兵周益昌力禦  
之遯去上大喜其明年連犯薊鎮宣府參將趙傾葵  
李光啓禦之敗死上下賞格擒斬俺答諸酋者賜萬  
金爵伯擒斬丘富周原者三百金授三品武階亡虜  
中者舍人張邦奇自言俺答有秘書寶劔在威遠堡

虜急攻堡不破去歸虜畜邦奇帳下其智能之不如  
富其愛惜之則愈富甚副總兵田世威密遣富故人  
王勳及弟浩入虜招之大同人孫廷美陷虜中心不  
平富所爲與浩謀刺之浩曰說之歸不從刺死之未  
暮也因共說富富問計於諸生計安國曰居與歸孰  
善汝爲我籌安國曰公歸林中羽而居則釜中鱗也  
官家招降之文擒俺答者予萬金寧不信耶公莫若  
以此時成事取功名毋失邦奇曰勿聽君無重世之  
德於中國而有累世之怨購方急歸且爲他人功能  
取功名乎富怒令邦奇與浩相質邦奇罵浩曰若賣

丘公與中國耳富遂殺廷美與浩約呂仲祐內應攻大同是年趙全亡入虜全故與富皆用白蓮教惑人官捕富急富先亡至是全事覺與李自馨同入虜詣俺答俺答使與富處富故居豐州州在大同右衛大邊外崇山環合水草甘美富與全自馨城而居之構宮殿墾水田曰板升板升華言屋也全教虜益習攻取圍困掩襲之事俺答喜加全與自馨爲會長每出掠則置酒全所問計云丘富之約呂仲祐內應攻大同也教虜分三道入會虜謀言中國今有備關陝遊騎又皆安難樂死乃散去而邦奇私引虜數十騎索

其秘書寶劔堡中卒擒之并得呂仲祐奸狀伏誅事  
聞命厚恤浩廷美家三十六年虜入右衛抵應朔懷  
仁諸州縣其冬俺答子辛愛有妾名桃松寨私通其  
部目收令哥懼誅來降總督楊順自詔爲功送之闕  
下辛愛來索不得縱掠大同諸墩堡圍右衛數重順  
恐詭言虜願易我以趙全丘富總制尚書許論亟奏  
許之于是遣桃松寨及收令哥歸出寨誘之西走陰  
告辛愛辛愛執而殺之不惟趙全丘富不可得虜益  
圍右衛亟烽火斷絕者六月餘城中薪屋食牛馬上  
逮順詔獄代以兵部侍郎江東黜論爲民代以楊博

其時故帥尚表在圍中率兵突圍與戰獲俺答孫及  
塔與酋各一人而博與巡撫楊選總兵楊承勛嚴兵  
分進虜解三十八年虜謀大舉入寇諜者偵其將入  
屯駐會州屬夷影克哈孩等爲嚮導誑稱虜欲東犯  
總督薊遼王忬遽分兵東兵奔頓號令數易虜遂乘  
間入潘家口事聞降巡撫順天都御史王軫二級外  
調之總兵歐陽安等論死繫獄切責忬忬惶恐稱疾  
上怒忬不任逮詔獄論死西市復使楊博代是歲山  
西僉事張時破虜於龍門

時易州人傳聞虜至私與部將計虜入必先掠龍門

龍門宣府右臂也龍門失守虜必乘勝南下逼近紅門此爲患不少乃自選騎卒得士百餘人趨援龍門

能虜果大至凡數萬會其營分屯夾道爲營營長可  
數十里時復私計曰虜至不知我有備且賊雖衆屯  
夾道道狹難倖聚可掩擊也固出死士數十人夜襲  
虜營營中大亂首尾不得相救盡獲騾馬牛羊以歸  
台吉聞之大駭黎明悉衆來攻龍門時令集民間車  
環以爲營以五色絲繪畫龍文衣車上出城中老弱  
守之而以精騎自將而前與台吉戰大破台吉兵於  
龍門之野我兵銳甚往往馳戟入虜壁斬騎將騎墜  
輒刺殺之有捕虜者謂台吉言我累歲盜邊莫我抗  
今若此固憤不肯退及遙望見後車車盡五絲龍文  
勢甚壯望之如山業思爲遁計適城中樵夫爲虜所  
得問得虛車狀虜乃大笑復奮我兵殪殊死戰不可  
拔相持至暮所擊殺無數我兵死者三十九年春虜  
亦百數十人虜困罷去卒保龍門之

聚喜峰口外窺犯薊鎮大同總兵楊漢出擣其帳于

灰河虜稍遠徙其秋漢復與參將王孟夏等擣豐州

焚板升百餘居頃之虜攻山西盤道梁越關大掠循

代州以南轉掠五臺崞縣出寧武關漢乃坐革職是時也俺荅居西海患踵部下病死率衆東還犯莊浪殺掠甚多四十二年三衛夷會通罕叩關索賞薊鎮副總兵胡鎮伏而執之縛其黨十餘人曰向者爾夷來關下撲我謀卒四今送所撲我卒者來抵我卒命通罕之子懼送撲我卒者至而通罕者辛愛之義妻父也總督侍郎楊選則釋所送人獨畱通罕令其與諸子更迭質以牽制辛愛使無寇邊三衛夷人皆怨通虜大入掠順義三河等處京師爲戒嚴選引通罕父子斬之然後尾虜入援虜大掠諸縣鎮所殺鹵亡



算總兵孫臆遊擊趙溱死之既七日乃出疲極失道  
衆皆撩亂諸將尚莫敢發一矢望塵尾之而已上審  
虜所以入皆坐選質通罕所致而選誅矣此其大者  
爾其餘終嘉靖之世寇邊者不可勝紀也俺荅有騎  
七萬其精騎可萬餘黃台吉有騎二萬其精騎可七  
八千青台吉有騎萬其精騎可三四千大入大利小  
入小利我所以備無論春秋不待馬肥也虜有一酪  
一肉分甘命醕目其大會以及諸部皆遍而我將士  
隔絕不免寒餒虜傳箭爲號令心志齊一而我施發  
靡常虜馬已馬也馬始生驅之乘高絕險飽養之而

我卒養官馬虜以搶掠爲生我徒謀逃死而已世宗  
自其初年已畱心邊事晚節淵居西內顧未嘗一日  
忘陞圉之政庚戌以後周防尤切每風霾見異輒行  
警戒請兵請餉毋所悵發益復明功罪邊臣邊將時  
有失事輕者逮繫重者就誅夷邊臣邊將益圖張功  
掩敗而嚴嵩當國乘上深宴多營貨賄稍有敗事唯  
有徙直長安冀左右上前買此七尺軀而已大農所  
發邊餉卽不貲多以充橐遺不肖者用肥其家矣自  
楊選誅後邊臣益務自覆嘉靖末年遼東總督都御  
史劉燾知上奉玄謹疏言諸將禦虜功狀謂虜入犯

時值海水暴漲騎多陷沒者上曰此海若効靈下禮部祭告之燾等皆賞其敢於滑稽誣罔如此此時丘富來塞下中流矢死矣獨趙全在虜奉俺荅爲皇帝作朝殿燒紙上樑贊呼萬歲天忽風殿樑落虜壓死數人俺荅驚不敢坐也其所爲板升虜西掠則畱居其老穉有衆千餘守之虜不耐暑夏徙帳入青山口亦不能屋居云趙全說俺荅口薊門臺垣固所徵卒常選未易卒攻晉中兵弱亭郭稀石隰間多肥羊良鐵可致也中國人藉宣雲爲救而宣雲卒來千里人馬俱罷我以全制其敝得所欲矣俺荅乃分六萬騎

爲四道入并坪朔州老營偏頭關諸處邊將皆不能禦虜長驅入嵐遂破石州殺其知州亮石州男女死者數萬人復分犯文水交城平陽介休攻汾八晝夜不利引去東趨鴈門出虜人內地且以一月計損人畜數十萬是爲穆宗元年全說俺荅曰自此塞鴈門扼居庸據雲中上谷效石晉故事南北之勢成矣然是時俺荅已老亡大計也居頃之三衛酋勾土蠻入朔州塞大蹂昌黎撫寧樂亭盧龍間總兵李世忠不敢出擊虜圍之圍解諸將追之有棒棰崖深十餘丈會大霧虜迷失道墮崖崖滿後騎踐之過諸將得超

割首俺荅有孫名把漢那吉者鐵背台吉子生三歲而孤俺荅盡屠鐵背台吉諸婦使其妻養之長爲娶仄慎部女曰大成比妓把漢那吉又自聘免捨金的女未娶而俺荅有外孫女業許配襖兒都司矣美而豔俺荅則自取之號曰三娘子襖兒都司怒且治兵相攻俺荅慚予之免捨金的把漢那吉恚會俺荅西掠土番把漢那吉攜其妻及乳母之夫阿力哥等扣敗胡堡求入總督尚書王崇古大同巡撫方逢時相與計此奇貨可居吾豐館餽飭輿馬官爵之示俺荅俺荅急之則因與媾使送我板升諸叛人不聽卽脅

誅那吉牽沮之又不然而撫納如漢匈奴質子事  
使招其故部居近塞俺荅老且死而黃台吉立我以  
一屠者谷蠡秩秩那吉勢必爭我因按兵稱助推亡  
固存此安邊大略也因具以上聞詔可授那吉指揮  
使阿力哥正千戶俺荅白西番聞把漢那吉亡來歸  
疾馳還率數萬騎軍平虜城外所樹旗志裂帛爲雜  
色白如荼朱如火玄如墨趙全益教之必困我俺荅  
妻哭罵俺荅曰耄諄不遑死信漢叛兒侵漢是速殺  
吾孫也俺荅乃遣吏使來祈請崇古故不令使人見  
把漢那吉引之高閣上騶從導把漢那吉其下吏使

訝問那吉耶胡爲乎漢威儀諦視果也喜還報崇古  
因使虜所狎者鮑崇德與俱俺荅見崇德大悅崇德  
責俺荅太師有孫忿而入中國中國官之侈之騶從  
而盛之衣冠太師不德乃用稱兵太師有孫在中國  
人手而太師不念也不亦不愛其孫之甚耶俺荅曰  
我敢犯中國我思我孫請以珍贖崇德曰中國何貴  
珍也太師誠聽吾畫可無一緡費俺荅曰唯命崇德  
曰叛人趙全在太師所有年矣今太師有叛人入中  
國而中國納之日夜教中國苦太師太師不甘心之  
乎太師若以此時歸中國叛人中國誅叛而太師收

愛此寧費一縑者俺荅喜上書請約摩騎避一舍而  
黃台吉未之知也以萬騎趨鎮城崇古示以把漢那  
吉矢黃台吉手矢泣曰此亡弟故物遣其部虜隨使  
入逢時勞之醪糒黃台吉喜遂去俺荅欲先得把漢  
那吉後送全崇古不可乃使副總兵蔡宗儒之子爲  
質俺荅喜遣伍奴柱叔捕趙全李自馨劉四等以獻  
自馨者諳文字四有膂力而周原善醫聞變先自燭  
矣伍奴柱故俺荅紀綱僕自俺荅愛全伍奴柱乃出  
其下至是縛全悉分其貲財把漢那吉歸祖孫鳴鳴  
勞苦百拜南向因遣使人謝求貢方物備外臣上下



議兵部議未定詔三鎮並議之乃磔趙全等於市復下廷議諸臣言利者十一言害者十九兵部尚書郭乾言夷狄來王古今盛事而因以羈縻之制馭長策也九塞諸虜俺荅最雄自上谷抵甘涼穹廬萬里嘉靖間以謝絕致憤蹈藉諸邊三十餘年今儼然聽命藩籬之外夫復何惜橐街尋丈之地隔閼夷情慙小皇化失神靈想望宜從其請而大學士高拱與崇古力主之俺荅乃與崇德爲鑽刀之盟其詞曰天王佛祖證我盟誓兩家有違遭此鋒利於是具疏稱臣願世世內屬詔封俺荅爲順義王昆都力哈及黃台吉

爲都督同知把漢那吉爲指揮使賓兔台吉等十八人爲指揮同知那木台吉等十九人爲指揮僉事打兒漢台吉等十八人爲正千戶呵拜台吉等十二人爲副千戶恰台吉等二人爲百戶俺荅率所部受詔甚恭使使貢馬謝恩百官班賀是爲隆慶四年昆都力哈卽老把都也頃之兵部下市令貢馬毋過五百匹上駟三十進御夷使毋過百五十人設藁街邊城無入都市期自二月以至四月爲卒大同于左衛得勝堡宣府于萬全右衛山西于水泉營黃台吉與父不相能異市新平堡市物虜以馬雜畜皮毛我以金

能繙繙直六萬緡賞賜酒肉布帛費四千緡西  
虜吉能及切盡著力二會等復請市詔予吉能市紅  
山墩切盡著力二會市寧夏清水營吉能者吉囊子  
始俺答受封時切盡等在營語使者曰我西陲之會  
也帝何遺澤焉崇古令好語曰爲若請矣至是亦封  
吉能爲都督同知部酋四十九人授指揮千百戶有  
差與切盡著力皆許市明年春老把都吉能相繼死  
俺答念佛表請金字經及刺麻僧詔給遣之已復以  
四事請給順義王印封諸壻市鐵鍋聽虜使入京兵

部議印宜予鐵鍋宜勿予卽予三銅使者毋聽入止  
而饗之邊諸塔稍給財物毋輕予官從之俺荅每市  
時身赴場凜凜奉約束陰主其子弟躑躅邀索因而  
示調停黃台吉市每後期部下卒時掠我民復劫車  
夷革固等東徙革固者不知其所從來嘉靖間始流  
居宣府塞下而先是有史夷者亦以黃台吉暴虐自  
拔歸諸帥以黃台吉劫車夷請兵之崇古曰虜方和  
毋怒也請諭虜王每口置二酋分地于阨謂之守口  
夷自虜市成邊境稍寧蓋顧諸臣始謀本謂借和修  
邊備其後備既不修抑又復弛虜凌驕不如約所市

易率敗馬一入輒死而我歲直日增至縻金錢數十萬緡不給則剝士供之凡刺自正德後稀往來嘗與虜戰殺其酋虜部每西輒以復讎凡刺爲名大饗食諸番西北苦之而東虜土蠻數入遼東塞李成梁守遼東以功封寧遠伯

卽曰天道恢恢豈不大哉雖窮荒異類人彘行其間也先狼悍卒不得其死俺荅無大志求貢市而已累請不許憤焉蹂邊者三十餘年其晚節稽首稱外臣用以善終蓋明興以來二虜至強矣古云虜者天之驕子非也有豪傑生其間焉則強至謂縉紳之儒專

主和親介冑之士專論征伐今乃反之縉紳之儒則主征伐介冑之士斯議和親一當其難一不履其事也然予考論防邊之道無他焉謹烽火嚴斥堠信賞必罰與士卒同甘苦古人備矣夫人君者蓋在馭將哉蓋在馭將哉

元良哈古東胡地高辛氏之裔昔高辛時游海濱過棘城闕遇顓頊之墟樂之封其子厭越居焉邑於紫蒙之野號曰東胡漢鮮卑唐吐谷渾宋契丹皆其地也在烏龍江南漁陽塞北元時爲大寧路北境高帝既有天下東夷遼王惠寧王朶顏元帥府各遣使來

朝於是卽古會州地置大寧都司封子權爲寧王填  
之後置大寧朵顏福餘三衛指揮使司故是  
名內外二邊與遼東宣府東西爲外藩成祖靖難時  
將引兵南向患寧王滿其後自永平攻大寧入之謀  
擁寧王燕府中賜予兀良哈說之兀良哈皆喜成祖  
行寧王餞之郊兀良哈從一呼皆戰遂擁寧王西入  
關於是取其三千人爲奇兵立三千營成祖德兀良  
哈天下既定盡割大寧地與之徙寧王南昌徙行都  
司於保定等處尋增置卜喇哈衛大小頭目二百七  
十枝歲再貢給牛其酒食布帛良厚自是其部落益

蕃我第守內邊與宣遼聲援隔絕矣久之陰附阿魯  
台二十年上親征阿魯台還師擊之大敗其衆於屈  
烈河斬首數百擒酋長數十人盡收其牛羊駝馬十  
餘萬宣德三年上出巡邊駐蹕遵化適其衆萬餘入  
寇上以鐵騎三千分兩翼擊之手射其前鋒三人斬  
其酋渠正統中屢寇遼東延安境上怒其反覆不常  
命成國公朱勇興安伯徐亨都督馬亮陳懷等分剿  
之勇等擒捕其擾邊賊徒獲其人畜而左參將都督  
同知楊洪亦俘斬兀良哈安出等部下於克列蘇等  
處兀良哈亦尋悔罪自獻所獲犯邊諸人朝貢不絕



也三衛中惟朵顏據地最險兵騎最強十四年也先  
寇東部大寧福餘不能自立從也先爲向導隨之來  
貢見我所以待也先比其待三衛加優數倍憤然謂  
我畏強而慢弱自是天順成化閒與朵顏輒通北虜  
毛里孩乷加思蘭等入寇己輒謝罪國家輒撫納之  
而彼亦小小爲寇抄不絕弘治中守臣楊友張瓊燒  
荒出塞掩殺甚衆自是釁起陽順陰逆然亦貪我賞  
賜不絕正德中朵顏酋長花當之子寇馬蘭谷參將  
陳乾禦之花當子射乾乾死本兵王瓊請責問花當  
執其子償罪花當懼寧棄其子不敢絕漢好嘉靖中

與北虜爲婚媾時時導虜入我邊詰問之輒支吾對  
我中國不能爲我主與婚媾求好而已朶顏會長近  
有長昂董狐狸炒蠻夷婦大小嬖只猛可順等號爲  
六兒長昂死其子賴蟒尤兒橫恃險而強有自來矣  
王世貞三衛志正統九年詔發兵二十萬分四軍成  
國公勇出喜峰口左都督懷出古北口除藥江波柳河經大小  
劉家口左都督懷出古北口除藥江波柳河經大小  
與州過神祠破福餘於全寧破泰寧朶顏於虎頭山  
國男婦以千計馬牛羊以萬計還加公勇太保伯亨  
進徹侯都督諒懷賜爵伯自是三衛雖衰敗然怨我  
刺骨因通也先爲鄉導入寇矣考實錄分兵入境皆  
是第未嘗以大捷獻及還師封拜諸將書及三衛怨  
刺骨蓋其私記誇誕  
之詞而世貞採之也

郎曰葉夢熊曰永樂八年北伐至鳴鑾戍語金幼孜

曰滅此殘虜唯守開平興和大寧遼東寧夏甘肅則  
邊境永無事矣是棄大寧非成祖意後世謂欲借曷  
夷藩籬中國誤矣至宣德五年并開平而失之喪地  
三百里繇是左右臂俱折而松關潢水險固在虜夫  
不得祖宗之意而揣摩其影響以幸苟安此二百餘  
年之大誤也